

**Kaabke Ua
Tshoob
Hab
Kev Plujtuag**

THAWJ TSAAVXWM COV LUG NQUAHU

Peb cov Moob kws nyob Lostsuas teb hab cov kws tsiv tuaj nyob tebhaws Amelikas nuav tub pib ntseeg Vaajtswv txij xyoo 1950 lug lawm. Txawm le ntawd los tseem tshuav ob yaam kaabke kws peb coobleej tseem tso tsi tau tseg, xwsle tshoobku hab nteeg tuag. Thaus txug ob lub saamthawj nuav cov Moob kws tub ntseeg Vaajtswv lawm tseem koj lawv nraim le tug kws tsi tau ntseeg Vaajtswv. Qhov teebmeem yog le nuav:

1. Tug ntseeg Vaajtswv kws muaj tshoobkus lossis ntsib kev plujtuag ntawd yog tug kws kev ntseeg tseem tsi tau khov. Thaus ntsib ob lub saamthawj zoo le has nuav nwg txawm rovqaab moog hu cov kwvtij kws tsi ntseeg Vaajtswv tuaj nrug nreg. Thaus puab tuaj nrug nreg puab txhaj yuam kuas ua Moob txuj kaabke qub kws ibtxwm ua lug. Moob tej kaabke ntawd feem ntau yeej cuamtshuam Vaajlugkub xwb. Tug ntseeg zoo le nuav nwg ua ob lub neej nyob ob lub ntuj.
2. Pawg ntseeg tsi muaj tug txawj lossis tsi xaav paab tug tswvcuab kws muaj tshoobku lossis ntsib kev plujtuag. Thaus txug ob lub saamthawj nuav cov thawjcoj huv pawg ntseeg tseem has rua tug tswvcuab ntawd has tas, “Taav nuav, tshoobku (lossis kev txomnyem) lug txug koj lawm. Ua le koj cov kwvtij ne yog cov twg?” Tub tsimnyog cov thawjcoj huv pawg ntseeg sawv nreg nroog nrug tug tswvcuab ntawd leg rooj tshoob lossis lub nteeg tuag kuas lawvle cov ntseeg kev sis hlub, tabsis puab tseem muab teg dlejnum ntawd pov rovqaab rua tug tswvcuab ntawd cov kwvtij. Yog cov kwvtij ntseeg Vaajtswv tes kuj tsi muaj teebmeem dlaabtsi, tabsis yog puab tsi tau ntseeg Vaajtswv tes puab yuav ua tej kaabke lawv nraim le tug tsi ntseeg ua.
3. Tug tswvcuab kws muaj tshoobku lossis ntsib kev plujtuag ntawd yeej yog tug nyam txuj qub kevcai. Thaus muaj tej xwmtxheej nuav nwg yog tug yeem moog hu cov kwvtij kws tsi ntseeg tuaj nrug hab zoo sab hlo tso rua puab koj lawvle Moob tej qub kevcai kws cuamtshuam Vaajlugkub. Thaus nug has tas yog ua caag nwg ua le ntawd tes nwg teb tas, “Yog tsi ua le cov kwvtij has tes puab tshev yug heev.” Tabsis qhov tseeb nwg tub yog tug nyam

tej qub kaabke ntawd.

Vaajtswv Txujlug qha has tas peb cov kws ntseeg Vaajtswv lawm tsi xob ua lub neej le tuabneeg nplajteb ntxiv lawm, tabsis peb yuavtsum hloov dlua tshab (Loos 12:1). Tub yog peb tsi xaav ua txuj qub kevcai peb txhaj lug ntseeg Vaajtswv. Yog ua caag peb tseem ca tug ub tug nua yuam peb rov moog koj tej qub kevcai ntawd? Yog tej ntawd tseem zoo hab peb tseem nyam, yog ua caag peb ho lug ntseeg Yexus? Vaajlugkub has tas koj yuav haus Vaajtswv lub khob hab dlaab lub khob tsi tau, hab koj yuav noj sau Vaajtswv lub rooj hab dlaab lub rooj tsi tau (1 Kaulethaus 10:21). Peb taug txuj twg lawm yuav tau taug txuj ntawd xwb. Yog ua caag peb tseem ntshai cov kwvtij kws tsi ntseeg tshev hab thum? Tswv Yexus has tas yog leejtwg tsi kwv nwg tug ntoo dlaajteg nrug Yexus moog tug ntawd tsi yog Yexus le thwjtim (Lukas 14:27). Ntoo dlaajteg yog qhov kws raug luas tshev luas thum hab raug luas tsimtxom ntaag. Tug kws yog Yexus le thwjtim tag yuavtsum tiv tej kev luas tshev luas thum nuav.

Vim le ntawd HKM txhaj pumzoo tsaa ib paab kaavxwm lug khu phoo kaabke rua tshoobku hab kev plujtuag nuav hab muab luam rua cov ntseeg suavdlawg tau siv. Txawm nwg tsi yog kevcai lijchoj los nwg yog ib txuj kaabke rua cov ntseeg siv. Kuv thov nquahu kuas txhua tug kws yog tswvcuab rua peb HKM hab rua huv Cov Ntseeg Yexus hab Kev Koomteg Qha Txujmoo Zoo (The Christian and Missionary Alliance) kuas yuavtsum koj hab ua lawvle phoo kaabke nuav. Yog leejtwg tsi yuav lug hab tseem pheej koj lawvle Moob tej kaabke qub kws cuamtshuam Vaajlugkub, kuv thov nquahu rua txhua pawg ntseeg kuas xob khaiv hab xaiv tug ntawd lug ua thawjcoj saib cov ntseeg ntxiv lawm ruaqhov nwg tsi muaj tug coojpwm zoo le Vaajlugkub has huv 1 Timautes 3.

Thov Vaajtswv koj hab nrug txhua pawg ntseeg hab txhua tug tswvcuab kuas koj tau lawvle phoo kaabke nuav.

Vaajtswv Dlejnum,

Dr. Timothy Txawj Teev Vaj
Thawj Tsaavxwm rua HKM

KAAXWM COV LUG COJ

Peb Hauvpaug Koomhum Moob (HKM) txujkev ntshaw yog kuas peb cov Ntseeg Yexus muaj kaabke zoo hab koj lawvle Vaajtswv Txujlug rua kev ua tshoob hab kev plujtuag. Yog le ntawd, nyob rua xyoo 1987 peb HKM txhaj tsaa tau ib paab kaavxwm lug sau hab ua tav phoo *Kaabtshoob Kev Ku* hab tau tsaa dlua ib paab kaavxwm lug npaaj hab sau phoo *Kev Pluj Kev Tuag* tav rua xyoo 1992. Ob paab kaavxwm nuav txhaj lug npaaj tau peb HKM phoo ntawv “*Kaabtshoob Kev Ku hab Kev Pluj Kev Tuag.*”

Phoo ntawv nuav kuj ua tau ib txujkev zoo rua peb ntau leej hab ntau pawg ntseeg taug, tabsis peb cov xwbfbw, cov txwjlaug, hab tej pawg ntseeg yeej tseem tsi yoog tej qauv huv phoo ntawv nuav. Thaus lug txug kev tshoob kev ku hab kev plujtuag, peb nyag ib leeg tseem ua lawm nyag ib yaam. Dlua le ntawd, peb cov xwbfbw hab txwjlaug feem coob yog cov yeej tsi paub txug kev ua tshoobku hab kev ua nteeg plujtuag le phoo ntawv nuav. Thaus muaj ob yaam dlejnum nuav, peb tseem vaamkhom cov laug kws txawj txug ob yaam dlejnum nuav. Tub yog vim le nuav HKM lub Rooj Saablaaj Txwmxyoo xyoo 2002 txhaj pumzoo kuas cov tsaavxwm huv HKM tsaa dlua ib paab kaavxwm lug khu peb phoo *Kaabtshoob Kev Ku hab Kev Pluj Kev Tuag.* Yog le ntawd, cov tsaavxwm huv HKM txhaj tsaa tau xyaa leej lug ua cov kaavxwm rua saab *Kaabtshoob Kev Ku hab Kev Pluj Kev Tuag* le nuav:

Kx. Ntxoov Xeeb Yaaj – Thawj Kaavxwm
Kl. Tsaav Sawm Hawj – Appointed Secretary
Dr. Tswv Txos Thoj – Active Secretary
Kl. Tsuj Yob Thoj – Tug Paab
Kl. Zaam Ntaaj Thoj – Tug Paab
Kx. Num Tuam Vaaj – Tug Paab
Kx. Xulus P. Xyooj – Tug Paab

Paab kaavxwm nuav tau sis thaam thawj zag yog lub 1/16-17/2004 hab zag ob yog 5/24-26/2004 nyob Thornton, Colorado. Puab kev sis thaam ob zag nuav tau lug khu le nraag nuav:

Qhov ib yog khu lossis hloov cov lug huv phoo ntawv nuav kuas zoo hab phim le cov lug kws siv rua kev tshoobku hab kev plujtuag.

Qhov ob yog muab kev ua tshoobku hab kev plujtuag tso kuas moog lawvle (order) txujkev has tshoob hab kev ua nteeg plujtuag.

Qhov peb yog lug rhawv hab ntxiv tog ntxhais saab kev has tshoob hab ntxiv tshoobku rua pujntsuag yawmntsuag hab pujnrauj yawmnrauj.

Qhov plaub yog muab ntau yaam lug ua kevcai ntxiv rua ntu kws yog sau txug kevcai hab ho rhu ntau yaam kws tsi zoo tawm huv kev tshoobku hab kev plujtuag. Nwg tsi yoojyim muab phoo *Kaabtshoob Kev Ku hab Kev Pluj Kev Tuag* nuav ua kevcai lijchoj vim nwg hajyaam yuav ua teebmeem rua peb cov xwbfbw, txwjlaug, hab pawg ntseeg.

Qhov tsib yog muab phoo ntawv nuav lub npe hloov ntawm “*Phoo Ntawv Kaabke Kws Qha Txug Kaabtshoob Kev Ku hab Kev Pluj Kev Tuag Ntawm Cov Ntseeg Yexus*” moog ua “*Cov Ntseeg Yexus Le Kaabke Ua Tshoob & Kev Plujtuag.*” Qhov kws hloov le nua yog hloov kuas tau lub ntsablug hab lub homphaj le huv phoo ntawv nuav.

Peb cov Ntseeg tau thaam txug “*Cov Ntseeg Yexus Le Kaabke Ua Tshoob hab Kev Plujtuag*” nua nyob rua HKM lub Rooj Saablaaj Txwmxyoo xyoo 2004 nyob Seattle, WA. Lub Rooj Saablaaj Txwmxyoo xyoo ntawd tau pumzoo tsocai rua cov tsaavxwm huv HKM nrug tshuaj hab nrug pumzoo rua kev khu phoo ntawv nuav. Cov tsaavxwm xyoo 2004 ntawd muaj le nuav:

Dr. Txawj Teev Vaj – Thawj Tsaavxwm
Kl. Nom Yaj Muas – Tug Teevntawv
Dr. Nom Lwm Thoj – Tug Canyon
Dr. Xeev Ntxawg Xoom – Tsaavxwm
Dr. Nyaj Zeb Thoj – Tsaavxwm
Kl. Ntxhoo Nyaj Yaaj – Tsaavxwm
Kl. Nyaj Zuag Thoj – Tsaavxwm
Dr. Nyiaj Vaj Vaj – Tsaavxwm
Kx. Vaam Tub Hawj – Tsaavxwm

Cov tsaavxwm huv HKM tau tshuaj ib lwm uake. Tomqaab ntawd puab tau tso rua Dr. Xeev Ntxawg koj moog khu ib lwm uantej koj moog luam ua phoo ntawv nuav. Yogle ntawd, thov nquahu kuas peb txhua pawg ntseeg yuav hab koj phoo ntawv nuav moog qha peb cov tswvcuab kuas koj hab siv lawvle tej kaabke huv phoo ntawv nuav.

TXHEEJTXHEEM

Thawj Tsaavxwm Cov Lug Nquahu	iii-iv
Kaavxwm Cov Lug Coj	v-vi
Txheejtxheem	vii
Tshoob Rua Nkauj Xwb Nraug Xwb	9-31
Zaaj Lug Qha	11
Ua Ntej Yuav Moog Has Tshoob	12-13
Thaus Sawvkev Moog Has Tshoob	13-14
Thaus Txug Tom Namtxiv Tsev	14-16
Thaus Moog Hu Kwvtij Lossis Cov Txwjlaug Tuaj Paab Has Tshoob	16
Thaus Pib Has Tshoob	16-18
Thaus Pub Tshoob	18-20
Yog Namtxiv Tsi Muab Tshoob	20-21
Thaus Tau Tshoob	21-23
Thaus Xaus Tshoob	23-25
Tsaa Qhua Sawvkev	26
Namtxiv Tog Ntxhais Tso Tub Yug	26-28
Namtxiv Tog Tub Tam Mejkoob	28-30
Lwmyaam Kws Tseemceeb	30-31
Xaus Lug	31
Kaabke Ua Tshoob Rua Tug Muaj Dlua Quaspuj Muaj Dlua Quasyawg Lug Lawm	33-41
Tshoob Pujntsuag Yawmntsuag	35-38
Tshoob Pujnrauj Yawmnrauj.....	38-40
Kevcai Tswj Kaabtshoob Kev Ku	41-44
Kev Pluj Kev Tuag	45-54
Lug Coj Kev Rua Kaabke Paam Tuag	47-48
Thaus Muaj Ib Tug Tso Nplajteb Tseg	49-52
Kev Uatsaug Rua Mo Xaus	53
Lwmyaam	53-54

**Tshoob Rua
Nkauj Xwb
Nraug Xwb**



ZAAJ LUG QHA

Vim peb cov Moob lug ntseeg Vaajtswv coob zuzjug lawm, hab muaj ntau yaam kevcai kws peb Moob ibtxwm coj hab ua lug, tabsis Vaajtswv Txujlug txwv tsi pub peb ua ntxiv lawm (Chivkeeb 24:50-52; Tsvldim 20:3-6; Daniyees 3:8-18; 2 Kevcai 18:10,14; 1 Kauleethaus 6:9-10; Efexus 5:18). Qee yaam kevcai kws has nuav muaj nyob rua huv kaabtshoob kev ku hab. Yog le Hauvpaug Koomhum Moob Qha Txujmoo Zoo ntawm Cov Ntseeg Yexus hab Kev Koomteg Qha Txujmoo Zoo (Hmong District of The Christian and Missionary Alliance) txhaj tsaa peb cov kws muaj npe lawv le nraag qaab nuav lug sis thaam hab tho ib txujkev rua peb cov Ntseeg Yexus kev ua tshoob ua ku. Feem coob ntawm cov nuav puavleej yog cov kws tau kawm kev ua tshoob ua ku hab tau ua mejkoob rua ntau rooj tshoob lug lawm.

Kx. Nyaj Tswb Yaaj – Thawj Kaavxwm
Kx. Txawj Teev Vaj – Tug Teevntawv
Kx. Xeev Pov Thoj – Tug Paab
Kl. Num Yig Yaaj – Tug Paab
Kl. Ntsuab Pov Vaaj – Tug Paab
Kl. Nyaj Ntaaj Hawj – Tug Paab
Kl. Xaiv Phaj Koo – Tug Paab
Kl. Nkaaj Zeb Thoj – Tug Paab
Kl. Nom Lauj Lis – Tug Paab

Peb tau pib sis thaam rua nubtim 10, lub 3 hlis ntuj xyoo 1987, nyob rua huv Kx. Num Tuam Vaaj tsev huv lub nroog St. Paul, Minnesota. Rooj saablaaj nuav tau siv sijhawm tsib nub hab tau lug xaus rua nubtim 14 ntawd.

Yog le peb yuav pib ib ntus zuzjug moog lawvle txujkev txujcai kws peb Moob ibtxwm ua lug. Yaam twg kws peb tsi muab lug has rua huv nuav tes yog yaam kws peb cov ntseeg yuavtsum muab tso tseg moog. Yaam twg peb muab sau rua huv nuav los tsi tau txhais has tas yuavtsum ua le nuav xwb-xwb. Tabsis peb xam pum tas yog ua npaum le nuav xwb mas yeej yuav tau lawm.

I. UA NTEJ YUAV MOOG HAS TSHOOB

A. Namtxiv

Ua ntej yuav moog has tshoob, namtxiv yog tug npaaj hab nrhav txhua yaam. Yog tsi muaj namtxiv lawd, tug tub yuav tau moog thov kwvtij, lossis namntxawm txivntxawm, pujlaug yawmlaug tuaj paab sawvcev ua nam ua txiv, tabsis tug ntawd yuavtsum yog tug ntseeg Vaajtswv. Yog tug tub ntawd tsi muaj kwvtij kws ntseeg Vaajtswv tes has rua xwbfbw hab txwjlaug huv pawgntseeg tuaj paab.

B. Mejkoob Lossis Tug Cevlug

Ua ntej yuav moog has tshoob, yuav tau thov ib tug lossis obtug mejkoob. Mejkoob yuavtsum yog ib tug tuabneeg paubtaab, coj tug hab ntseeg Vaajtswv.

Kevcai thov mejkoob, yuav tau nqaa ib fwj dlej qaabzib moog laub rua nwg haus hab has le nuav:

“Kuv tuaj nuav yog tuaj thov koj moog ua txivtuam mejkoob, paab coj kuv tug tub _____ (npe) moog yuav nyaab, koj yeej muaj dlej muaj num los thov muab tso tseg moog paab kuv.”

C. Phijlaaj

Ua ntej yuav moog has tshoob, yuav tau thov ib tug ua Phijlaaj (ua nraugvauv luag) tuabyaam nkaus. Tug kws yuav moog ua phijlaaj yuavtsum yog ib tug tsi tau muaj cuab muaj yig.

Kevcai thov hab cov lug yuav moog tajj moog thov tes siv tuab co kws thov mejkoob ntaag. Yog tug txawj has, siv txawv zog los tau. Tabsis ncuntsoov qha meej tas nwg lub luag num tes yog ua phijlaaj ntaag.

D. Tug Ris Nraa

Ua ntej yuav moog has tshoob, yuav tau thov ib tug ua tug ris nraa. Tug ris nraa nuav yog tug hluas los tau lossis yog tug muaj cuab muaj yig lawm los kuj tau hab.

Kevcai thov lossis cov lug thov tes cale siv tuab cov kws thov mejkoob los tau, tabsis ncuntsoov qha meej tas nwg lub luag num yog ua tug ris nraa xwb.

III. THAUS SAWVKEV MOOG HAS TSHOOB

A. Rooj Ntxuag

Thaus thov tau mejkoob, phijlaaj, hab tug ris nraa tuaj txhij rua huv tsev lawd, namtxiv yuav tau ua ib rooj ntxuag tam puab hab tsa puab sawvkev. Laub puab ib leeg ob khob dlej hab has cov lug le nraag nuav:

1. Tug sawvcev namtxiv yuav tau has cov lug nuav:

“Thov koj mog txivtuam mejkoob _____ (npe), _____ (leej txiv npe) nwg txheem nwg nqaaj ntaab nwg muab nwg tub nyaab, nwg txheem nwg nqaaj tse nwg muab nwg tub se, tsi pum qaab vaam dlaag vaam zug vaam koj plhu txaj plhu ntsig moog ntaiv nub ntaiv hli moog tiv nam tiv txiv. Khob dlej zoo tsi muaj cob, tug ntxuag zoo tsi muaj rua koj chob; khob dlej zoo tsi muaj rua koj tsaws, tug ntxuag zoo tsi muaj rua koj khaws. Lu lug qhuav lug thov koj xwb los thov koj ua sab ntev moog paab. Rauj thaiv tes yuav raug koj, tabsis roj ntshaa tes nwg ua nam ua txiv ua tug ris.”

2. Cov lug cob rua tug phijlaaj, ris nraa hab ntxhais ua-luag has le nuav:

“Thov koj mog _____ (npe luag num), _____ (leej txiv npe) nwg txheem nwg nqaaj ntaab nwg muab nwg tub nyaab, nwg txheem nwg nqaaj tse nwg muab nwg tub se, tsi pum qaab vaam dlaag vaam zug vaam koj dlaag zug moog ua (tub luag, ris nraa, nkaujnyaab luag). Khob dlej zoo tsi muaj cob, tug ntxuag zoo tsi muaj rua koj chob; khob dlej zoo tsi muaj rua koj tsaws, tug ntxuag zoo tsi muaj rua koj khaws. Lu lug qhuav lug thov koj xwb los thov koj ua sab ntev moog paab.”

3. Cov lug cob nyajtxag hab khoom siv.¹

“Has rua koj ua txivtuam mejkoob, obtug ua nam ua txiv npaaj tau \$ _____ muab rua koj koj moog siv. Yog has tas txaus lawm los haj yam zoo, yog tsi txaus los rov lug ntxhi nug rua obtug ua nam ua txiv maam tsheebseeb (npaaj) lug ntxiv.”

B. Lub Kaus

Pumzoo muab lub kaus, dlej cawv, luamyeeb, hab pe tso tseg lawm (HKM Rooj Saablaaj Txwmxyoo 1984 nyob Covenant Heights Bible Camp, Estes Park, Colorado).

III. THAUS TXUG TOM NAMTXIV TSEV

Thaus moog txug namtxiv tsev lawd tug mejkoob yuav tau laub dlej qaabzib rua nam rua txiv (cev rua txiv ua ntej le maam cev rua nam hab cov tij cov kwv suavdlawg). Yog cev kag ib leeg ib fwj tes yuav tau has kuas puab tho dlej haus. Tomqaab ntawd laub ob khob dlej qaabzib rua leej txiv hab pib has cov lug nuav rua nam rua txiv:

¹ Cov khoom siv yog (1) dlej qaabzib, (2) pob mov, plaub raab dlav hab obtug qab ntim su, hab (3) obtug qab ua phaaj ntxuag.

“Has rua koj ua nam ua txiv luas tas nkauj hlub tav txuj nkauj ua nkauj nam, nraug hlub tav ci nraug ua nraug txiv. Nkauj hlub tav txuj nkauj yuav nrhav txwj, nkauj txha tsheej ib yig, nraug hlub tav ci nraug yuav nrhav nkawm nraug txha tsheej ib cuab. Namtxiv tom u _____ (npe) nrug rua tug tub hu ua _____ (npe) nyam tsum koj tug ntshais _____ (npe), nwg txhaj thov kuas kuv ua txiv tuam mejkoob koj nwg tug tub tuaj yuav koj tug ntshais. Yuav tuaj nrug koj txuas neej txuas tsaav tis nruab tis ze. Yuav taabkaum koj ua nam ua txiv los thov koj ua sab ntev.”

Tomqaab ntawd rov laub dlej qaabzib rua nam rua txiv ib leeg ob khob hab has cov lug nraug nuav:

“Thov nug koj ua nam ua txiv saib koj muaj kwv muaj tij, muaj namntxawm txivntxawm, pujlaug yawmlaug, nugtij nugkwv lossis cov txwjlaug nua los thov koj qha peb es peb yuav moog thov tuaj paab peb saablaaj ntshi nug rua nam rua txiv. Yog tas tej tub tej ntshais noog has los kuas peb tau neej tau tsaav tau nruab tau ze. Yog tas tej tub tej ntshais tsua tsi noog has los peb txawj tuaj peb yuav txawj rov.”

Tomqaab kws tug mejkoob tog tub has taag lawd tej zag namtxiv tog ntshais teb le nuav:

“Mej tuaj los zoo kawg, tabsis namtxiv ntshais hlub cev tsi hlub sab, namtxiv tsi tau xaav qua, tshaav mej ntuj twg los mej ho moog.”

Yog namtxiv has le nuav tes mejkoob teb has tas:

“Namtxiv has los yeej yog namtxiv lug lauj, tabsis thov nam thov txiv yog tseg tes yuav tsi tuaj, yog tuaj lawm yuav tsi tseg, tuaj kev nqaim yuav rov kev dlaav, tuaj xaav kuas tau neej rov xaav kuas tau tsaav, thov nam thov txiv tso lug saib tshuav kwv tshuav tij kws ntseeg Vaajtswv nyob qhov twg los yuav moog hu tuaj.”

Thaus ntawd yog namtxiv muaj tug nruab tug ze kws namtxiv xaav kuas moog lawv tuaj tes namtxiv yeej qha ntaag. Thov kuas namtxiv hu cov kwvtij kws yog cov ntseeg Vaajtswv xwb. Yog tsi muaj cov kwvtij kws ntseeg Vaajtswv los hu cov txwjlaug huv pawgntseeg tuaj nrug namtxiv saablaaj.

IV. THAUS MOOG HU KWVTIJ LOSSIS COV TXWJLAUG TUAJ PAAB HAS TSHOOB

Thaus tau lug ntawm namtxiv lawm tes tug mejkoob sawvkev moog hu kwvtij/ txwjlaug tuaj nrug has tshoob. Thaus moog txug lawd, cev dlej rua luas haus hab has le nuav:

“Has rua koj ua _____ (txheebze), _____ (npe) tug tub kws hu ua _____ (npe) tuaj yuav _____ (npe) tug ntshais hu ua _____ (npe). Tsi pum qaab muab zug, yog le txhaj tuaj thov koj ua _____ (txheebze) moog paab peb saablaaj ntshi nug rua nam rua txiv. Yuav taabkaum koj dlejnum los thov koj moog paab peb.”

Yog luas nug tas namtxiv puas tau tsocai kuas yug tuaj tes cale qha ncaaj nraim has tas namtxiv kuas tuaj ntaag.

V. THAUS PIB HAS TSHOOB

A. Phaaj Ntxuag

Ua ntej yuav pib has tshoob muab qab hau. Thaus cov kwvtij tuaj txhij lawd hab yuav pib has tshoob tes mejkoob thov ib lub rooj lug teeb rua ntawm taag; txhoov nqaj tso rua huv phaaj hab tso rua sau rooj. Caw leej txiv hab cov kwvtij kws raug caw tuaj ntawd moog nyob rua ntawm rooj. Laub dlej rua puab ibleeg ob khob hab chob ntxuag cev rua txhua tug kws nyob

ntawm rooj. Coj puab noj ntxuag hab haus dlej ib lwm ua ntej maam rov laub dlua dlej ib lwm ntxiv.

B. Cov Lug Has

Tomqaab kws coj suavdlawg noj ntxuag hab haus dlej lwm ob taag ces pib has le nuav:

“Luas has tas, puj ua kaab yawm ua kev, puj ua tseg yawm ua ca, muaj tub yuav muab nyaab, muaj ntchais yuav qua, nkauj hlub nkauj ua nkauj nam, nraug hlub nraug ua nraug txiv, nkauj hlub tav txuj yuav nrhav txwj txhaj tshiej ib yig, nraug hlub tav ci yuav nrhav nkawm txhaj tshiej ib cuab. _____(npe) tug tub nyam tsum _____(npe) tug ntchais kws hu ua _____(npe). Peb txhaj coj nwg tuaj nrug namtxiv tom nuav tis tshoob tis ku tis nruab tis ze.”

“Tsi pum qaab muab zug txhaj vaamkhom mej cov ua pujlaug yawmlaug, namntxawm txivntxawm, nugtij nugkwv, hab kev txwj kev laug tuaj nrug namtxiv saablaaj ntchi nug rua tub rua ntchais. Muaj tshoob los has rua peb paub. Peb tuaj kev nqaim xaav rov kev dlaav, tuaj xaav kuas tau neej rov xaav kuas tau tsaav.”

Thaus ntawd tes puab yuav sawv moog dlua ib qho lawm hab moog sis nug txug qhov nuav. Txawm lecaag los puab yuav rov lug teb rua yug. Tej zag namtxiv tog ntchais yuav tso obtug lug teb le nuav:

“Namtxiv has le nuav, namtxiv tug ntchais hlub cev tsi hlub sab,² ib pluag tshais tsi tau noj, qhovtwg los tseem tog leej nam teg xwb. Yog le namtxiv yuav txais tsi taug mej neej tshoob. Mej txawj tuaj los mej txawj rov.”

Tug txivtuam mejkoob yuav tau has le nuav:

² Luj lawm tabsis tsi tau paub taab paub cai.

“Namtxiv txawm has le los yeej yog namtxiv lug. Luas has tas ib puas laag nyaj yuav tsi tau namtxiv lu lug nyaj lug kub. Tabsis namtxiv tsev nqeeb tsi yog chaw sim tawg, tsev vuag tsi yog chaw sim zeb.³ Sawm tsi nyog lub luag khwv lauj, tabsis thov meb ua tag rov qaab moog ntchi nug rua nam rua txiv dlua. Thov nam thov txiv txais namtxiv tom u tug ncej tshoob. Yog peb tseg tes peb tsi tuaj, peb tuaj lawm tes peb yuav tsi tseg.”

VI. THAUS PUB TSHOOB

Thaus namtxiv pub tshoob rua qhua lawd mas namtxiv yuav muaj dlua ib tug lug pub tshoob lossis yog obtug cevlug qub. Peb tsi pub txaav lub rooj rua lwm qhov, tabsis yog namtxiv tug tuabneeg kws lug pub tshoob muab lub rooj txaav rua lwm qhov tes tog tub tug mejkoob yuav tau txeeb rov lug tso qhov qub chaw.

A. Namtxiv Cov Lug

Namtxiv tug pub tshoob muab ob khob dlej lug cev rua tog qhua tug mejkoob. Puab yuav kuas yug haus, tabsis xob haus. Thaus ntawd namtxiv tog ntchais yuav has cov lug nuav:

“Taav nuav, has rua qhua paub, namtxiv tu namtxiv ntchais hlub cev tsi hlub sab, namtxiv nug ntchais lawm, ntchais lug tsi muaj dlaabtsi. Has rua qhua paub qhua txawj tuaj los txawj rov,⁴ nraugvaav hu saib nkaujnyaab puas nov.”⁵

³ Tuaj yuav quaspug tag-tag le, tsi yog laam tuaj thaab plaub.

⁴ Namtxiv pub tshoob lawm.

⁵ Namtxiv qee tug mejkoob kuj nyam has le nuav, “Has rua qhua paub, mej tuaj zawj ob nub peb mos, tabsis namtxiv txais tsi taug mej qhua ncej tshoob. Has rua mej paub es tshaav mej ntuj tsi peg, mej zab mej nplej teg, tshaav mej ntuj tsi taug, mej zab mej nplej caug, mej tuaj kev nqaim, rov kev dlaav. Namtxiv lug tes muaj le nuav xwb.”

B. Cov Lug Pub Tshoob

Thaus ntawd namtxiv tug pub tshoob laub ob khob dlej cev rua qhua tug mejkoob hab has kuas nwg haus, tabsis tsi xob haus, tsuas muab txawb rua ntawm rooj. Qhua tug mejkoob laub ob khob dlej rua namtxiv tug pub tshoob hab has kuas nwg ua sab ntev tog.

Tomqaab ntawd qhua tug mejkoob maam rov caw cov kwvtij hab pujlaug yawmlaug, namntxawm, txivntxawm, hab cov kev txwjlaug rov lug nyob rooj. Laub ib leeg ob khob dlej hab yog muaj ntxuag kuas puab khaws ntxuag hab has cov lug nuav:

“Vim peb rooj tshoob, txhaj taabkaum mej ib nub qoob; vim peb rooj ku, txhaj taabkaum mej ib nub num. Nub qaab nraagntsis mej caaj tshoob kev ku tuaj txug wb tej ntug zej ces wb yuav ua mej leej tub nrug to ntsej; nub qaab nraagntsis mej caaj tshoob kev ku tuaj txug wb tej ntug zog ces wb yuav ua mej leej tub to nrog. Ua mej suavdlawg tsaug.”

Tomqaab ntawd txivtuam mejkoob laub ob khob dlej moog cev rua namtxiv hab saib namtxiv yuav muab tug twg lug ua txivtxum mejkoob. Yog namtxiv yuav kuas tug twg ua txivtxum mejkoob los namtxiv cale qha rua qhua paub.

Thaus ntawd, txivtuam mejkoob yuav tau laub ob khob dlej rua txivtxum mejkoob hab thov lub rooj. Thaus thov tau lub rooj lawd ces koj tug txivtxum mejkoob lug nyob ntawm rooj hab laub ob khob dlej cev rua txivtxum mejkoob hab has tas:

“Taav nuav, tsi tsheej tshoob los tsheej tshoob tsi tsheej ku los tsheej ku lawm ces wb haus ob khob dlej nuav ua kwvyaig kwvluag sis tuav teg hlaa dlej ua luag dlhau zoov. Kuv tuaj los tsi paub dlaabtsi yuav vaam koj ua kwvluag paab hab qha xwb.”

Tug txivtxum mejkoob teb le nuav:

“Xob nyuaj sab, muaj dlaabtsi los wb obtug kwvluag maam sis paab kuas tav.”

C. Tug Ntxhais Ua Nkaujnyaab Luag

Thaus namtxiv muab tshoob lawm, tog vauv yuav tau rov lug thov ib tug ntxhais moog ua nkaujnyaab luag (nam txaisntsuab). Yuav tau siv tug ntxhais paubtaab kws yog noobnyoog kaumyim (18) xyoo rov sau.

Tug ntxhais ua nkaujnyaab luag nuav yuavsum yog ib tug kws tsi tau muaj cuab muaj yig. Cov lug thov cale siv tuab cov lug kws siv thov mejkoob, tabsis yuav tau qha meej has tas nwg lub luag num yog tug ntxhais ua nkaujnyaab luag.

VII. YOG NAMTXIV TSI MUAB TSHOOB

Yog namtxiv tsi muab tshoob,⁶ feem ntau yog tug nugtij lossis leej txiv ua tug lug muab ob khob dlej cev rua txivtuam mejkoob hab has cov lug tu moo rua qhua le nuav:

“Has rua koj txivtuam mejkoob, koj lug rua namtxiv tom u, tug ntxhais los tsi noog has, tsi yeem ces namtxiv yuav qua tsi tau. Tshaav mej ntuj tsi peg los mej zab mej nplej teg; tshaav mej ntuj tsi taug los mej zab mej nplej caug. Mej tuaj kev dlaav los rov kev nqaim. Mej xob tu sab.”

Lossis has le nuav:

“Has rua koj txivtuam mejkoob, koj lug rua namtxiv tom u, tug ntxhais los tsi noog has ces namtxiv yuav qua tsi tau. Tshaav mej ntuj twg los mej yimmeem moog, mej tuaj kev dlaav los rov kev nqaim. Mej xob tu sab.”

⁶ Muaj ib txha yog luas tsi muab tshoob tes luas lug nqaa lub rooj lossis muab ib yaa rooj tso rua nrau zoov.

Thaus ntawd, tug txivtuam mejkoob yuav has rua tug tu moo tshoob le nuav:

“Tshoobku tsi yog taag rua rooj nuav, cuag le namtxiv tom u tsuas tuaj taabkaum namtxiv tom nuav xwb lauj!”

VIII. THAUS TAU TSHOOB

A. Cov Lug Xeejxuum

Peb yog cov ntseeg lawm tsi xaav kuas muab lug xeej lug xuum coj lug has.

B. Nqe Mig Nqe No

Tomqaab ntawm, tug txivtuam mejkoob has cov lug nuav rua tug txum mejkoob coj moog rua namtxiv.

“Kwvluag, koj rov moog ntxhi nug rua nam tua txiv saib, namtxiv tug ntxhais namtxiv tu ab tu khwv, ncej qaab ua tog nyob ncej nqaab ua tog rau ncoo txhaj lujhlab, namtxiv nyuas nqe mig nqe no saib namtxiv xaav sau lecaag los ho feeb tuaj, nraugvauv txhaj pum qaab rheebeeb.”

Thaus ntawm yog namtxiv xaav yuav nqe mig nqe no⁷ lecaag los namtxiv maam has. Tabsis tsi tsimnyog namtxiv sau tug ntxhais nqe mig nqe no/nqe tshoob ntau ntau vim, peb ntseeg Vaajtsv hab tseem yuav vaam tug tub tug ntxhais rua yaav tomntej.

Tomqaab ntawm, tug txivtuam mejkoob thov txivtxum mejkoob kuas nrug namtxiv qev ib lub phaaj lug siv. Thaus tau lub phaaj lawd, tug txivtuam mejkoob muab cov nyaj nqe mig

nqe no tso rua lub phaaj hab muab rua txivtxum mejkoob coj moog rua namtxiv.

C. Lwmyaam Nyajtxag

Peb yog cov ntseeg Vaajtsv hab kev qua ntxhais yog kev tsaa tub ntxhais moog ua neej. Ruaqhov peb ua qoob lug npaaj tshaib tu tub tu kiv lug npaaj laug, peb tseem yuav vaam peb tej tub tej nyaab tej ntxhais tej vauv hlab peb rua yaav laug. Yog le ntawd, peb tsimnyog muab kev ntus cov nyaj nraag nuav tso tseg: (1) Nyaj khaubtsho rua namtxiv, (2) Nyaj pujtsag, (3) Nyaj qhwv tais laug hauvcaug, (4) Nyaj ntaus nco, hab lwmyaam kws teev rua nplooj ntawv 42, tug 9.

D. Noj Haus

Txivtuam mejkoob tsaws ob khob dlej rua txiv txum mejkoob hab has tas:

“Kwvluag, koj moog has rua namtxiv saib nraugvauv tuaj yuav tau namtxiv ib tug ntxhais moog ua neej lawm saib namtxiv yuav noj haus lecaag los namtxiv ho has tuaj.”

Ib txha mas nyam tso rua nraugvauv ua tug npaaj rooj noj rooj haus. Muaj ib txha ho pumzoo ca nraugvauv tuab teg them, namtxiv maam ua tug npaaj rooj noj rooj haus.

E. Nyaj Rua Tug Mejkoob

Yog cov txwjlaug huv pawgntseeg moog ua mejkoob/cevlug nua ces tsi muaj qhov tam mejkoob, tabsis yog namtxiv ho moog thov lwm tug ces namtxiv maamle tam mejkoob (mejzeej).⁸

⁷ Nqe tshoob lossis nqe quaspj.

⁸ Yog tas tug txivtuam mejkoob muab \$100 rua tug txivtxum mejkoob, tug txivtxum mejkoob muab \$50 rua tug txivtuam mejkoob.

Thaus nuav, txivtuam mejkoob tsaws ob khob dlej cev rua txivtxum mejkoob hab has tas:

“Kwvluag, has rua koj tas, kuv txivtuam mejkoob npaab tsi ntev sa tsi taug kwvluag naj peb ncig cev. Qhov nuav yog qhov nyuag nyaj sa sev.”

Tomqaab ntawd, tug txivtxum mejkoob maam le tsaws ob khob dlej rua tug txivtuam mejkoob hab has le nuav:

“Kwvluag, koj npaab ntev koj sa kuv naj peb ncig cev, kuv txivtxum mejkoob npaab tsi ntev kuv sa koj ib ncig cev xwb lauj! Qhov nuav yog qhov nyuag nyaj sa sev.”

F. Nyaj Txais Tw Txais Khee

Nyaj txais tw yog nyaj txais ceg npua hab nyaj txais khee yog nyaj txais khoom phijcuam. Luas pheej muab \$20 ua nyaj txais tw hab \$20 ua nyaj txais khee, tabsis Rooj Saablaaj Txwmxyoo 2004 pumzoo muab tso tseg le nqai 9 ntawm nplooj ntawv 38 huv phoo ntawv nuav lawm.

G. Nyaj Cheb Rooj

Luas ibtxwm muab \$10 ua nyaj cheb rooj, tabsis Rooj Saablaaj Txwmxyoo 2004 pumzoo muab tso tseg lawm.

IX. THAUS XAUS TSHOOB

A. Lug Xaus Tshoob

Thaus tshoobku hab kev noj haus tav taag lawm tes qhua vauv tug mejkoob yuav tau laub ob khob dlej cev rua namtxiv tug mejkoob hab has le nuav:

“Kwvluag, luas has tas, txug caij tuaj yuav tuaj; txug caij rov yuav rov. Thov kwvluag has rua namtxiv paub, nraugvauv xaav moog tsev ntxuv zog.”

Thaus ntawd, mejkoob tog ntxhais teb has tas:

“Kwvluag, ua sab ntev kuv maam koj lug rua namtxiv.”

B. Kawm Moo (Lug Cogtseg)

1. Namtxiv Coglug

Thaus tav txhua yaam hab yuav sawv kev, leej txiv lug coglug rua nraugvauv tug mejkoob le nuav:

“Has rua koj txivtuam mejkoob. Koj koj tug tub tuaj yuav kuv tug ntxhais. Koj koj lug moog has rua nam rua txiv tom u. Hauv hlua muab cob rua mej, qaab hlua kuv ua nam ua txiv tseem tuav. Kuv caj toog tais tsi tau kuv txhaj muab rua mej caj hlau tais, kuv yag tooj hau tsi tau muab rua mej yag hlau hau. Mej koj moog txawm tsi kab tsi kaig los mej yimmeem qhuabntuag rua txujkev ua noj ua haus. Thov mej tsi xob tshv nrug neej nrug tsaav. Yog has tas muaj ib nub twg mej tsi hlub, nyob tsi koom tog, pw tsi koom ncoo,⁹ noj mov ntxuag kua-muag, taug kev nrug suab quaj, nce toj tsi muaj tug soj, nqeg haav tsi muaj tug kaav. Kuv nov tseeb nov tsum; muaj povthawj ob leeg peb tug lawm tes kuv yuav nrug koj txivtuam mejkoob yuav cai ntaag laiv!”

2. Mejkoob Leeg Lug

Qhua vauv tug mejkoob teb has tas:

“Uatsaug ntau koj ua nam ua txiv. Namtxiv tej lug tes cuaj yog kaum yog. Namtxiv has los yog namtxiv tub namtxiv ntxhais. Thov koj ua nam ua txiv tsua ua ntsej nyaav mivntsiv hab. Yog tas nov tuaj nruab roob xwb

⁹ Tsi sis nyam, tsi sis hlub lossis tsi ua namtxiv le lawm.

los koj tsua ua sab luj hab. Yog tas nov tuaj nruab haa lawm tag los koj ua nam ua txiv maamle has.”

Tomqaab ntawd, yawmtxiv cev dlua ib khob dlej rua vauv hab has tuab yaam le kws has rua mejkoob lawd hab. Nraugvauv teb has tas:

“Has rua meb ua nam ua txiv, kuv yuav tau nwg, kuv yuav hlub nwg hab tsomkwm nwg kuas meb ua nam ua txiv tau chaw ntoj chaw thuv. Meb tsi xob poob sab.”

C. Khoom Phijcuam

Mejkoob tog ntxhais tsaws ob khob dlej rua mejkoob tog tub hab has le nuav:

“Has rua koj ua kwvluag, namtxiv lug has le nuav, luas has tas, qhua siv nyajtxag laub lug tuaj, tsajtxhu tuaj nqhaa nkuaj, nyajtxag tuaj nqhaa naas, los namtxiv ua lub neej tsi xws luas. Luas has tas, yuav zoo los yog nraugvauv maam koj moog phim tom u lauj.” Khoom phijcuam rua tub ntxhais tsuas muaj le nuav xwb:

1. _____
2. _____
3. _____

Thaus ntawd nraugvauv tug mejkoob teb has tas:

“Kwvluag, luas najtxwg pev txujlug tas, yuav hub tsi yuav zeg, yuav nkauj nyaab plaub txhais taw teg. Namtxiv tsi cale tseem muaj khoom phijcuam hab. Ua namtxiv tsaug mog. Uatsaug mog, nam hab txiv, namtxiv nraugvauv tom u tub tau namtxiv tug ntxhais tes tub zoo tsi txawj taag lawm los namtxiv tsi cale namtxiv tseem muab nyaj phijtsaab tsoog phijcuam rua ntxhais vauv koj moog ua neej. Ua namtxiv tsaug mog.”

X. TSAA QHUA SAWVKEV

A. Mejkoob Lug Rua Namtxiv

“Uatsaug nam hab txiv. Txuj kaab txuj ke muaj quas nco le ntawd, es peb tuaj koj koj tub koj ntxhais lawm, txawm dlua koj nplooj sab nplooj ntsws los koj ua sab luj hab. Peb koj obtug moog lawm, nub puav tsua koj obtug rov tuaj saib meb ua nam ua txiv dlua.”

B. Tug Vauv Cov Lug Rua Namtxiv

“Nam hab txiv, kuv tuaj koj _____ (npe) lawm txawm dlua meb nplooj sab los meb tsua ua sab luj hab. Wb moog nub puav wb maam rov tuaj saib meb dlua.”

XI. NAMTXIV TOG NTXHAIS TSO TUB YUG

Yog namtxiv thov tuabneeg ua mejkoob kws tsi yog ca rua cov txwjlaug huv pawgntseeg has ces tomqaab qhua rov moog tsev taag lawm, namtxiv ua ib rooj ntxuag, nqug tug mejkoob, qhua txwj qhua laug, hab ibtsoom kwvtij neejtsaa lug nyob rua ntawm rooj. Laub ib leeg ob khob dlej, chob ib leeg ib dlaim ntxuag, hab ua puab tsaug.

A. Txivtxum Mejkoob

Tug sawvcev namtxiv tog ntxhais has le nuav:

“Uatsaug, txivtxum mejkoob, nwg tso nwg nam ntaab moog tsaws tsua, tso nam muv moog ntsawj thoob.¹⁰ Nwg tso ntseg nuj moog raws dlej, ntseg naag moog tsaws ntxhee, tsi pum

¹⁰ Tso ntxhais moog yuav quasyawg lossis moog ua neej.

qaab yuav zug txhaj thov koj tuaj ua txivtxum mej¹¹ cevlug. Taav nuav nam ntaab tau chaw nyob nam mov tau chaw su. Ntseg nuj moog tau paag ntseg naag moog tau hawv. Nwg tsi muaj tug zoo ntxuag rua koj khaws tsi muaj zoo khob dlej rua koj tsaws. Cuag le ua koj ib lu lug tsaug qhuav xwb. Koj muaj tub muab nyaab muaj ntshais qua, koj yeejcuam (vaamkhom) tsi txug los tseg, yeejcuam txug los nwg ho tuaj paab koj xab ib tug ceg rooj.”

B. Qhua Txwjlaug Qhua Laug

Tug sawvcev namtxiv tog ntshais has le nuav:

“Uatsaug yawmtxoov namtxiv dlaab, nugtij, hab ibtsoom kwvtij neejtsaa; nwg tso nwg nam ntaab moog tsaws tsua, tso nam mov moog ntsawj thoob. Nwg tso ntseg nuj moog raws dlej, ntseg naag moog tsaws ntshhee, tsi pum qaab yuav zug txhaj thov mej tuaj nruug saib tub ntshais kev moog ua neej hab tuav txug qaab hluas. Taav nuav nam ntaab tau chaw nyob nam mov tau chaw su, ntseg nuj moog tau paag ntseg naag moog tau hawv. Nwg tsi muaj tug zoo ntxuag rua mej khaws, tsi muaj zoo khob dlej rua mej tsaws. Tsuas yog ua mej ib lu lug tsaug qhuav xwb. Nub qaab nraag ntsis, mej muaj tub muab nyaab muaj ntshais qua, mej yeejcuam tsi txug los tseg, yeejcuam txug los nwg ho tuaj paab mej xab ib tug ceg rooj.”

C. Ibtsoom Kwvtij Neejtsaa

Tug sawvcev namtxiv tog ntshais has le nuav:

“Uatsaug ibtsoom kwvtij neejtsaa, nwg tso nwg nam ntaab moog tsaws tsua, tso nam mov moog ntsawj thoob. Nwg tso ntseg nuj moog raws dej, ntseg naag moog tsaws ntshhee. Vaam mej suavdlawg tuaj saib tub ntshais kev moog ua neej.

Taav nuav nam ntaab tau chaw nyob nam mov tau chaw su, ntseg nuj moog tau paag ntseg naag moog tau hawv. Nwg tsi muaj tug zoo ntxuag rua mej khaws, tsi muaj zoo khob dlej rua mej tsaws. Tsuas ua mej ib lu lug tsaug qhuav xwb. Nub qaab nraag ntsis, mej muaj tub muab nyaab muaj ntshais qua, mej yeejcuam tsi txug los tseg, yeejcuam txug los nwg ho tuaj paab mej xab ib tug ceg rooj.”

XII. NAMTXIV TOG TUB TAM MEJKOOB

Thaus koj nkaujnyaab lug txug tsev, namtxiv tog tub yuav tau ua ib rooj mov lug uatsaug rua tug mejkoob, tug phijlaaj, nam txaisntsuab, tug ris nraa, hab tug sawvcev namtxiv moog nreg rooj tshoob.

Thaus ua tav rooj mov nuav lawd, hu puab cov nuav lug nyob rua ntawm rooj. Laub puab ibleeg ob khob dlej, ib leeg ib tug ntxuag, hab ua puab tsaug.

A. Txivtuam Mejkoob

Tug sawvcev namtxiv tog tub has le nuav:

“ _____, nwg tsaa nwg nqaaj nthaab nwg muab nwg tub nyaab, nwg tsaa nwg ncej tse nwg muab nwg tub se. Tsi pum qaab yuav zug txhaj thov koj dlaag koj zug, koj plhu txaj plhu ntsig moog ntaiv nub ntaiv hli, koj koj kev txawj kev ntse moog nplig nam nplig txiv lub sab txhaj tau nyaab lug txug vaaj tau sev lug txug tsev. Nwg tsi muaj tug zoo ntxuag rua koj khaws, tsi muaj zoo khob dlej rua koj tsaws. Tsuas ua koj ib lu lug tsaug qhuav xwb. Thov Vaajtswv foom koobmoov rua koj.”

B. Phijlaaj

Tug sawvcev namtxiv tog tub has le nuav:

¹¹ “Txivtxum mej” yog ib lu lug luv lug ntawm txivtxum mejkoob.

“ _____, nwg tsaa nwg nqaaj nthaab nwg muab nwg tub nyaab, nwg tsaa nwg ncej tse nwg muab nwg tub se. Tsi pum qaab yuav zug txhaj thov koj dlaag koj zug ua tub luag moog nrhav nyaab. Nubnua tau nyaab lug txug vaaj tau sev lug txug tsev. Nwg tsi muaj tug zoo ntxuag rua koj khaws, tsi muaj zoo khob dlej rua koj tsaws. Tsuas ua koj ib lu lug tsaug qhuav xwb. Thov Vaajtswv foom koobmoov rua koj.”

C. Tub Ris Nraa

Tug sawvcev namtxiv tog tub has le nuav:

“ _____, nwg tsaa nwg nqaaj nthaab nwg muab nwg tub nyaab, nwg tsaa nwg ncej tse nwg muab nwg tub se. Tsi pum qaab yuav zug txhaj thov koj dlaag koj zug ua tub ris nraa. Yuav koj dlaag koj zug ris nqaj ris no moog rua nam rua txiv tom u tau noj moog tsau plaab, namtxiv txhaj xyivfaab, tub txhaj tau nyaab, lug txug vaaj. Koj ris dlej ris ntxuag moog rua nam rua txiv tom u haus moog puv cev, nam txiv txhaj xyibyeem (zoo sab), tub txhaj tau sev lug txug tsev. Nwg tsi muaj tug zoo ntxuag rua koj khaws, tsi muaj zoo khob dlej rua koj tsaws. Tsuas ua koj ib lu lug tsaug qhuav xwb. Thov Vaajtswv foom koobmoov rua koj.”

D. Ntxhais Ua Nkaujnyaab Luag

Tug sawvcev namtxiv tog tub has le nuav:

“ _____, nwg tsaa nwg nqaaj nthaab nwg muab nwg tub nyaab, nwg tsaa nwg ncej tse nwg muab nwg tub se. Tsi pum qaab yuav zug txhaj thov koj dlaag koj zug moog ua luag. Koj moog ua luag, moog ua ntxuam txaij ntxuam nraug, ntxuam ntaab ntxuam mov, ntaab tuaj los ntaab tsi plev, mov tuaj los mov tsi tum. Koj moog saib kev ruajntseg tub hluv tuaj los tsi dleev, tub hluas tuaj los tsi thaam. Txhaj tau nyaab lug txug vaaj tau sev lug txug tsev. Nwg tsi muaj tug zoo ntxuag rua koj khaws, tsi muaj zoo khob dlej rua koj

tsaws. Tsuas ua koj ib lu lug tsaug qhuav xwb. Thov Vaajtswv foom koobmoov rua koj.”

E. Tug Nreg Tshoob

“ _____, nwg tsaa nwg nqaaj nthaab nwg muab nwg tub nyaab, nwg tsaa nwg ncej tse nwg muab nwg tub se. Tsi pum qaab yuav zug txhaj thov koj dlaag koj zug ua nam ua txiv moog nreg tshoob nreg kug. Nraa sib los koj leeg nqaa, nraa nyaav los koj leeg ris txhaj tau nyaab lug txug vaaj tau sev lug txug tsev. Nwg tsi muaj tug zoo ntxuag rua koj khaws, tsi muaj zoo khob dlej rua koj tsaws. Tsuas ua koj ib lu lug tsaug qhuav xwb. Thov Vaajtswv foom koobmoov rua koj.”

Thaus ua txhua tug tsaug taag lawd tes has cov lug uatsaug xaus rua suavdlawg le nuav:

“Ua mej suavdlawg tsaug mog, nub qaab nraag ntsis, mej muaj tub muab nyaab, muaj ntxhais qua, mej yeejcuam tsi txug los tseg, yeejcuam txug los nwg ho tuaj paab mej xab ib tug ceg rooj. Thov Vaajtswv foom koobmoov rua mej.”

Thaus ntawd mejkoob maam has tej lug kws namtxiv tom u has lug ntawd rua cov ua nam ua txiv hab cov ua kwv ua tij tom nuav noog. Yog muaj nyaj hab khoom phijcuam los mejkoob maam lug plovmeej tej nuav rua nam rua txiv.

XIII. LWMYAAM KWS TSEEMCEE

A. Npe Laug

Peb cov ntseeg kws muaj quaspuj mivnyuas lawm tsimnyog muaj npe laug. Kev tis npe laug, siv cov tuabneeg nraag nuav tug twg tuaj tis los tau. Tabsis yog has tas namtais yawmtxiv tseem nyob, xub has rua obtug ua ntej.

1. Namtais yawmtxiv
2. Namtxiv lossis kwvtij
3. Xwbfwb lossis txwjlaug huv pawg ntseeg

Thaus tis npe laug, tsi pumzoo kuas muaj xeejxwm hab siv cawv ntsim.

B. Hlaabnyas

Yog namtxiv yuav muab hlaabnyas rua tej ntxhais vauv los tau, tabsis ca ua khoom pub xwb, tsi xob muab ua kev ua cai tam.

C. Noobncoos

Tsi pumzoo kuas cov ntseeg muaj noobncoos lawm rua qhov noobncoos muaj feem txuam kev ua dlaab.

XIV. XAUS LUG

Tsimnyog rua peb cov ntseeg Yexus ua tshoobku hab lwmyaam kevcai kws has lug sau nuav kuas yoojyim. Tsuas pub ua le tug qauv kws has huv phoo ntawv nuav lossis ua kuas yoojyim dlua nuav xwb.

- ❖ Txhua yaam kws has lug sau nuav, lub Rooj Saablaaj Txwmxyoo 1987 (North Platte, NE) tau pumzoo txais yuav lawm hab Rooj Saablaaj Txwmxyoo 2004 (Seattle, WA).

**Kaabke Ua
Tshoob Rua Tug
Muaj Dlua
Quaspuj Muaj
Dlua Quasyawg
Lug Lawm**

I. TSHOOB PUJNTSUAG YAWMNTSUAG

A. Qhov Chivlug

Kev ua tshoob pujntsuag yawmntsuag; yog has txug tug yawmntsuag kws yuav pujntsuag, tug tub hluas yuav tug pujntsuag, hab tug yawmnrauj yuav tug pujntsuag. Thaus muaj le nuav lawd, yuav tau siv txuj kaabkev nuav rua kev npaaj hab moog has tshoob.

B. Thaus Yuav Moog Has Tshoob

Ua ntej yuav moog has tshoob, tug tub lossis tug yuav moog yuav quaspuj ntawd nam hab txiv yuav tau npaaj tuabneeg nrug moog. Yog nwg tsi muaj nam muaj txiv tes tug tub yog tug npaaj tuabneeg nrug nwg moog, tabsis puab yuavtsum yog cov ntseeg Vaajtswv. Yog tug tub ntawd tsi muaj kwvtij tes tug tub yuav tau has rua xwbfbw hab txwjlaug huv pawg ntseeg tuaj paab nwg.

1. **Tug Sawvcev Ua Nam Ua Txiv** – Namtxiv lossis tug tub yog tug npaaj ib tug ua tug sawvcev nrug nwg moog has tshoob.
2. **Mejkoob/Tug Txiv Nug** – Nwg los yog namtxiv kwvtij lossis cov txwjlaug huv pawg ntseeg yuav tau paab moog thov ib tug ua mejkoob.
3. **Roos Mov**

Thaus thov tau tug sawvcev hab mejkoob lawd, namtxiv lossis tug tub yuav tau npaaj ib roos mov rua suavdlawg noj ua ntej sawvkev hab has cov lug le nuav:

“Thov koj koj _____ (npe) nuav moog nrhav nam los yog txwjnkawm. Yuav moog yuav _____ (npe) ntaag. Txawm ho yuav taabkaum koj dlejnum los thov koj ua sab ntev moog paab. Cov

nyajtxag kws yuav koj moog siv muaj le nuav \$_____. Koj yimmeem siv. Yog txaus lawm los hajyaam zoo, yog tshuav qhov twg tsi txaus los rov qaab has rua peb ua nam ua txiv peb maam tsheebseeb.”

C. Thaus Has Tshoob

1. Kev Nug

Thaus moog txug, tug mejkoob yuav tau laub ob khob dlej rua tug tswvtsaab (tug kwvtij kws saib tug nyaab lossis tug nam ntawd) hab has le nuav:

“Namtxiv tom u kuas wb koj _____ (npe) tuaj nug mej tug _____ (npe) nuav saib koj xaav tas kwvtij tug twg tuaj nrug saablaaj ntxig nug los koj ho paab hu tuaj.”

2. Roos Ntxuag

Thaus suavdlawg tuaj txhij lawd, yuav tau nqug ib lub roos, laub dlej, cev ntxuag rua puab, muab mivntsiv nyaj hab has le nuav rua cov tswvtsaab:

“Has rua mej cov ua nam ua txiv ua kwv ua tij, luas tas khuv xaav los tsi khuv has, vim txiv nraug laaj quas hau tis lis ntsoov peb tis aav luaj dlub, txhaj tu tu nam nkauj laag sab quas laag ntuj tsig pis nraab nub. Vim txiv nraug laaj quas hau tis lis ntsoov peb tis aav luaj dlaag, txhaj tu tu nam nkauj laag sab quas laag ntuj ntsig pis nraab nraag.”

“Peb xaav tuaj nug saib _____ (npe) puas muaj tug sau lossis yuav. Yog muaj kwv theejfaaj, peb txawj tuaj los txawj rov qaab. Yog tsi muaj kwv theejfaaj ces tu maab los peb yuav txuas kuas tau maab. Yog muaj kwv sau lawd los peb txawj tuaj los txawj rov, yog tsi

muaj kwv sau ces tu ncau los peb yuav txuas kuas tau ncau.”

Thaus nuav, cov tswvtsaab yuav moog saablaaj hab lug teb le nuav:

“Ab! Taav nuav tes peb tug tub tuag pum ntxaa lug. Peb kuj nug lawm hab tsi muaj tug kwv sau le lawm. Pujntsuag qua pujntsuag cev tes mej yimmeem nug. Yog nwg tsi yeem los yuav ua peb tub peb nyaab tes peb yuav hlub moog. Yog nwg ho yeem lawd los tu maab mej txuas maab tu ncau mej txuas ncau.”

Thaus ntawd, tug mejkoob yuav nug tug nam ntawd le nuav:

“Khuv xaav los tsi khuv has vim koj tug quasyawg tuag pum ntxaa lug tes txhaj tuaj nug koj saib koj puas yeem peb tug tub. Yog koj yeem los peb txhaj sau moog hlub. Yog koj tsi yeem los peb yuav tsi yuam. Thov koj ho teb ib lus rua peb paub.”

Thaus nuav, tug nam ntawd yuav teb le nuav:

“Yog tas mej hlub tau tag los yuav los yuav.”

Yog thaus tug nam yeem tes yuav tau rov moog nug tswvtsaab le nuav:

“Peb nug nwg lawm nwg has tas yog peb hlub taug tag los nwg nrug peb moog saib mej cov ua kwv ua tij yuav sau lecaag? Has es peb ho ntxiv.”

Thaus ntawd, cov kwvtij yuav moog saablaaj hab rov lug teb le nuav:

“Peb yuav sau le nuav \$_____.”

3. Kev Noj Haus

Ua ib pluag mov rua tswvtsaab noj. Hab thaus coj lug txug tsev lawd, yuav tau moog ua ib pluag mov zeem neejtsaa.

D. Thaus Rov Lug Txug Tsev

Thaus yuav tau nam lug txug tsev lawd, yuav tau npaaj ib pluag mov noj ua Vaajtswv tsaug hab uatsaug rua tug mejkoob, tug sawvcev ua nam ua txiv, hab lwm tug.

II. TSHOOB PUJNRAUJ YAWMNRAUJ

A. Qhov Chivlug

Kev ua tshoob pujnrauj yawmnrauj yog has txug tug yawmnrauj yuav pujnrauj, tug yawmntsuag yuav pujnrauj lossis tub hluas yuav pujnrauj. Thaus muaj le nuav lawd, yuav tau siv txuj kaabkev nuav rua kev npaaj hab moog has tshoob.

B. Thaus Yuav Moog Has Tshoob

Ua ntej yuav moog has tshoob, tug tub lossis tug yuav moog yuav quaspug ntawd nam hab txiv yuav tau npaaj tuabneeg nrug moog. Yog nwg tsi muaj nam tsi muaj txiv tes tug tub yog tug npaaj tuabneeg nrug nwg moog, tabsis puab yuavsum yog cov ntseeg Vaajtswv. Yog tug tub ntawd tsi muaj kwvtij tes tug tub yuav tau has rua xwbfbw hab txwjlaug huv pawg ntseeg tuaj paab nwg.

1. **Tug Sawvcev Ua Nam Ua Txiv** – Namtxiv lossis tug tub yog tug npaaj ib tug ua tug sawvcev nrug nwg moog has tshoob.

2. **Mejkoob/Tug Txiv Nug** – Nwg los yog namtxiv kwvtij lossis cov txwjlaug huv pawg ntseeg yuav tau paab moog thov ib tug ua mejkoob.

3. **Roov Mov**

Thaus thov tau tug sawvcev hab mejkoob lawd, namtxiv lossis tug tub yuav tau npaaj ib roov mov rua suavdlawg noj ua ntej sawvkev hab has cov lug le nuav:

“Thov koj koj tug tub _____ (npe) nuav moog nrhav nam los yog txwjnkawm. Yuav moog yuav tug ntxhais _____ (npe). Txawm ho yuav taabkaum koj dlejnum los thov koj ua sab ntev moog paab. Cov nyajtxag kws yuav koj moog siv muaj le nuav \$ _____. Kojyimmeem siv. Yog txaus lawm los hajyaam zoo, yog tshuav qhov twg tsi txaus los rov qaab has rua peb ua nam ua txiv peb maam tsheebseeb.

ua txiv lossis ua neej ua tsaav saib mej tug ntxhais hab mej tug vauv tej tw xaiv tw lug puas tshuav dlaabtsi lawm? Yog has tas tsi muaj dlaabtsi lawd, peb tuaj nuav yog tuaj nrug mej tis nruab tis ze.”

Thaus nuav, namtxiv hab cov neejtsaa yuav moog saablaaj hab tug cev lug yuav lug teb le nuav:

“Ntawm peb tug tub tug ntxhais tes plaub ntug yeej dlawbhuv lawm. Yog muaj leejtwg ntshaw raug nyam tsum los peb yeej qua tau.”

Thaus ntawd, tug mejkoob yuav thov cov ua nam ua txiv paab nug tug ntxhais saib nwg puas yeem yuav tug tub. Thaus nuav, cov neejtsaa yuav moog nug tug ntxhais hab tug cev lug yuav lug teb le nuav:

“Yog mej tug tub ntshaw raug nyam tsum hab hlub taug tag los peb tug ntxhais tsi muaj lug dlaabtsi. Peb ua nam ua txiv los pumzoo.”

Thaus namtxiv lug teb le ntawd lawm, tug mejkoob laub ob khob dlej rua tug cev lug hab nug le nuav:

“Yog namtxiv hab tug ntxhais tsi muaj lug dlaabtsi lawm, thov nug saib namtxiv yuav noj haus hab sau lecaag?”

Thaus ntawm, tug cev lug yuav rov moog nrug namtxiv saablaaj hab lug teb le nuav:

“Namtxiv tub ntxhais rhais ib ruam rov qaab lug lawm, namtxiv yuav xaav sau le nuav \$ _____. Kev noj haus nyob ntawm vauv npaaj tau lecaag los noj le ntawd.”

C. Thaus Has Tshoob

1. **Kev Nug**

Thaus moog txug, tug mejkoob yuav tau laub ob khob dlej rua namtxiv, pujlaug yawmlaug, namtxawm txivntxawm lossis tug kws tsomkwm nwg, hab has le nuav:

“Namtxiv tom u kuas wb koj tug tub _____ (npe) tuaj nug mej tug ntxhais _____ (npe) nuav saib koj xaav tas yuav hu kwvtij tug twg tuaj nrug saablaaj ntxig nug los ho thov koj paab hu tuaj.”

2. **Roov Ntxuag**

Thaus suavdlawg tuaj txhij lawd, yuav tau nqug ib lub roov, laub dlej, cev ntxuag, hab muab mivntsiv nyaj rua namtxiv lossis kev txwj kev laug thov puab nug tug ntxhais le nuav:

“Has rua mej cov ua nam ua txiv ua kwv ua tij, peb xaav koj tug tub _____ (npe) nuav tuaj yuav mej tug ntxhais _____ (npe). Thov nug mej ua nam

D. Thaus Rov Lug Txug Tsev

Thaus yuav tau nam lug txug tsev lawm, yuav tau npaaj ib pluag mov noj ua Vaajtswv tsaug hab uatsaug rua tug mejkoob, tug sawvcev ua nam ua txiv, hab lwm tug.

KEVCAI TSWJ KAABTSHOOB KEV KU

1. Kev sis yuav ua txwj ua nkawm, qhov zoo yog moog has huv tsev, tsi tsimnyog yuav nqug lossis haub moog ntsag tu rua qhov Vaajtswv Txujlug qha tas yuavtsum fwm nam fwm txiv. Yog tej mivnyuas sis nyam lawd, tsi tsimnyog tej nam tej txiv yuav txwv. Yog tej mivnyuas tsi yeem lawd, namtxiv tsi xob yuam (Efexus 6:1-4).
2. Kev has tshoob muaj mejkoob lossis tsi siv mejkoob ces siv txwjlaug. Tug mejkoob/txwjlaug yuavtsum yog ib tug ntseeg kws paub qaab hau. Qhov zoo tsi xob ca tug xwbfbw los yog tug thawj txwjlaug huv pawg ntseeg moog ua mejkoob. Xwbfbw ua tug nrug saablaaj hab paab nrhav mejkoob los tau. Yog thaus tsi muaj tug ua tau lawd, thawj txwjlaug moog ua mejkoob los tau.
3. Txwv tsi pub coj lub kaus moog has tshoob lawm (Rooj Saablaaj Txwmxxyoo 1984 nyob Covenant Heights Bible Camp, Estes Park, Colorado).
4. Txwv tsi pub pe, siv cawv hab luamyeeb lug rua huv rooj tshoob. Pumzoo ca muaj dlej qaabzib hab phaaj ntxuag xwb.
5. Txwv tsi pub ua xeejxwm luj-luj rua thaus tsa qhua vauv sawvkev.
6. Tsi pub muaj kev sis tib le ibtxwm pheej muaj lug. Yog tej tub ntxhais has mee lawm has tas tsi yeem, yuav tau tso tseg tsi pub thov kuas tib los yog lam cai kuas tib.
7. Peb yog cov ntseeg lawm, yuavtsum zaamtxim xwb, tsi pub nplua (Mathais 18:21-22).
8. Cov ntseeg tsi pub muaj ncauj ntsag (ntaus nyuj) (Rooj Saablaaj Txwmxxyoo 1997 nyob Maranatha Bible Camp, Nebraska).

9. Peb yog cov ntseeg Vaajtswv hab kev qua ntxhais yog kev tsa tub ntxhais moog ua neej. Rua qhov peb ua qoob lug npaaj tshaib tu tub tu kiv lug npaaj laug, peb tseem yuav vaam peb tej tub tej nyaab tej ntxhais tej vauv hlub peb rua yaav laug. Yog le ntawd, peb tsimnyog muab kev ntus cov nyaj nraag nuav tso tseg: (1) nyaj ntuag ntxhais, (2) nyaj muag kev txhum, (3) nyaj khaub tsho rua namtxiv, (4) nyaj pujtsag, (5) nyaj pujlaug yawmlaug, (6) nyaj namntxawm txivntxawm, (7) nyaj nugtij nugkwv, (8) nyaj qhwv tais laug hauvcaug, (9) nyaj ntaus nco, (10) nyaj tuam choj tshab, (11) nyaj fi-xuv, (12) nyaj txais ncej tshoob, (13) nyaj txais tw txais kee, (14) nyaj kev txwj kev laug, (15) nyaj khaib num khaib tswv, (16) nyaj cheb rooj, hab lwmyaam nyaj (tshwj nqe mig nqe no hab noj haus).
10. Txhua nkawm namtxiv kws tug xwbfbw los yog pawg ntseeg yuav ua tau kevcai txis yuavtsum yog nkawm kws xub tau ntawv tso cai ntawm numtswv lawm xwb. Tej tub ntxhais noobnyoog tsi tau txug le numtswv kevcai, qua tsi tau. Yog namtxiv pumzoo qua hab tub ntxhais yeem lawm los nyob ntawm namtxiv, tabsis txwv tsi pub hu tug xwbfbw moog koom hab ua kevcai txis.
11. Nkawm namtxiv kws xwbfbw yuav ua kevcai sis txis huv tuamtsev chaav pehawm rua yuavtsum yog nkawm kws zoo le nraag nuav:
 - a. Obtug ob leeg puavleej muaj noobnyoog lawvle txuj kevcai.
 - b. Obtug puavleej ntseeg Vaajtswv.
 - c. Obtug thov tau ntawv sis yuav ntawm numtswv lawm.
 - d. Obtug roojtshoob yog tuaj has huv tsev.
 - e. Thaus pub tshoob lawd, nraugvauv tsi tau coj nkaujnyaab moog tsev.
 - f. Tug tub tsi tau nrauj dlua quaspuy hab tug ntxhais tsi tau nrauj dlua quasyawg, txawm nrauj los nwg tsi yog tug txhum.
 - g. Tug yawmntsuag kws yuav pujntsuag, tug yawm ntsuag kws yuav ntxhais hluas, tug tub hluas kws yuav tug

- pujntsuag, tug yawmntsuag kws yuav tug pujnrauj kws tsi txhum,¹² tug yawmnrauj kws tsi txhum yuav tug pujnrauj kws tsi txhum, hab tug tub hluas kws yuav tug pujnrauj kws tsi txhum, tabsis puab yuavtsum moog has huv tsev.
- h. Nkawm namtxiv twg kws tsi tau ntseeg Vaajtswv, tabsis obtug cale leeg lug ntseeg hab txais yuav Tswv Yexus tim ntsej tim muag ntawm tug xwbfbw kws yuav ua kevcai rua obtug.
12. Nkawm namtxiv kws xwbfbw yuav tsi ua kevcai txis tshoob rua huv chaav pehawm yog nkawm kws zoo le nuav:
- Tub xub nyob uake le namtxiv lawm.
 - Tug tub kws tub thaam lwm tug ntxhais muaj mivnyuas lawm lossis tug ntxhais kws tub xeeb mivnyuas uantej yuav quasyawg.
 - Tsi tau ntaub ntawv sis yuav ntawm numtswv.
 - Tug yawmnrauj lossis pujnrauj kws yog tug txhum.
13. Yog nkawm namtxiv kws tub sis yuav ua ntej lawd tuaj thov xwbfbw suam obtug dlaim ntawv sis yuav, xwbfbw muaj cai suam, tabsis yuav tau ua le nuav:
- Siv sijhawm qhuabntuag obtug txug kev ua txwjnkawm.
 - Muab obtug sis txis le txujcai ntawm lub xeev.
 - Obtug yuav tau koj tuabneeg tuaj lossis xwbfbw yuav tau has cov txwjlaug nrug ua timkhawv txug obtug kev sis yuav.
14. Yog obtug kws tsi tau ntseeg Vaajtswv tuaj thov xwbfbw suam obtug dlaim ntawv sis yuav, xwbfbw muaj cai suam, tabsis yuav tau ua le nuav:
- Siv sijhawm qhuabntuag obtug txug kev ua txwjnkawm.

- Qha Vaajtswv rua obtug.
- Muab obtug sis txis le txujcai ntawm lub xeev.
- Obtug yuav tau koj tuabneeg tuaj ua timkhawv txug obtug kev sis yuav.

15. Xwbfbw yuav tsi ua kevcai sis txis rua tug quasyawg kws yuav quasyawg hab tug quaspj kws yuav quaspj. Pawg ntseeg yuav qheb tsi tau lub tuamtsev rua cov zoo le nuav siv.
16. Tsi tsimnyog rua cov ntseeg muab puab tej tub tej ntxhais qua rua saab nrau kws tsi tau ntseeg Vaajtswv, tshwj tej tub tej ntxhais puab caum puab lawm (Mathais 18:6; 2 Kauleethaus 6:14).
17. Yog ib tug ntseeg twg moog yuav cov saab nrau kws tsi tau ntseeg Vaajtswv, lossis ib tug saab nrau kws tsi tau ntseeg tuaj yuav tug kws ntseeg, kev taug muaj le nuav:
- Cov thawjcoj huv pawg ntseeg moog ua tsi tau mejkoob.
 - Xwbfbw ua tsi tau kevcai txis tshoob. Xwbfbw tsuas moog thov tau Vaajtswv rua obtug thaus lug txug tsev yog tas obtug muaj noobnyoog le numtswv txujcai.
 - Xwbfbw suam npe tau rua obtug dlaim ntawv sis yuav, tabsis yuav tau koj lawvle nqai 13.
 - Cov ntseeg moog koom noj haus los tau.

¹² “Tug tsi txhum” yog tug kws nwg tug quaspj lossis quasyawg moog ua kev nkauj kev nrau hab sis nrau lawm.

Kev Pluj

Kev Tuag



LUG COJ KEV RUA KAABKE PAAM TUAG

Yeej tsi muaj leejtwg xaav nov hab xaav ntsib txujkev pluj kev tuag. Tej laug ibtxwm has tas, “Ua neej nyob xaav muaj tsi xaav pluag, xaav caj tsi xaav tuag.” Vim peb pujkoob yawmkoob Adaas hab Evas tsi noj lug tsi noog has, peb suavdlawg txhaj ntsib txujkev pluj kev tuag.

Tsi muaj ib lub sijhawm twg kws cov ntseeg yuav siv xwbfbw moog paab paub npaum le thaus muaj ib tug ntseeg taag simneej. Tsev tuabneeg twg ntsib kev pluj kev tuag, kev quaj kev ntsuag, tsev tuabneeg ntawd yeej yuav tog quas ntsoov has tas xwbfbw hab cov ntseeg yuav moog nrug paub hlub, paab nplig hab paab paub tauv paub lub kua-muag. Lub sijhawm nuav yog lub sijhawm kws tsev xyomcuab yuav tig hab qheb paub lub sab ntsws lug txais Vaajtswv txujkev hlub hab kev nplig sab kws xwbfbw yuav coj moog nplig paub. Paub yuav ncu Vaajtswv hab xwbfbw txajntsig moog ibtxhis yog lub sijhawm nuav.

Xwbfbw yuav tau mob sab hab ceev nrooj moog nrug tsev xyomcuab hlub thaus nov xuv tuaj txug. Xwbfbw yuavtsum paab tsev xyomcuab saablaaj tuav tswvyim txug kev tu hab paab tug tuag moog rua qhov kws ua rua Vaajtswv tau ntsejmuag. Xwbfbw yuavtsum paab paub lug ntawm kev muab Vaajtswv Txujlug moog txhawb, moog nplig hab moog tauv paub lub kua-muag. Xwbfbw yuavtsum paab paub kawg nwg lub peevxwm, kawg nwg tug zug hab lawvle Vaajtswv yuav paab nwg ua tau. Xwbfbw yuav tau ceebtoom rua cov ntseeg kuas tuaj moog nrug hlub hab nrug paab tsev xyomcuab le cov ntseeg ibtxwm muaj lug.

Tug sawvcev xyomcuab yog tug kws nrug xwbfbw dlha txij tog txij peg paab tsev xyomcuab hab saib kuas ib puas tsaavyaam ua tau moog lawvle tsev xyomcuab hab xwbfbw tau pumzoo ua. Vim peb txhua tug ntseeg yog Vaajtswv le mivnyuas, thaus muaj ib tug ntseeg twg taag simneej, peb yuav tau moog paab, moog hlub, moog tu hab moog paam tug ntawd kuas tsimnyog nwg yog ib tug ntseeg Vaajtswv hab yog peb ib tug txheeb tug ze, kwvtij kwvnpawg ntawm Tswv Yexus lub npe.

Qhov kws peb tu hab paab peb tej tuabneeg tuag yog qhov kws peb ntsuag tau has tas peb vaammeej lecaag. Tsaav tuabneeg twg tu hab

paam paub tej tuag zoo, tsaav tuabneeg ntawd yog tsaav tuabneeg kws vaammeej. Peb yog cov ntseeg Yexus, tsimnyog peb tu hab paam peb tej tuag kuas zoo hab tsimnyog.

Vaajtswv kuj tau paab hab faus Nwg tej tuabneeg tuag hab. Nyob rua huv 2 Kevcai 34:5-6, Vaajtswv Txujlug has tas, “*Tug Tswv tug tubkhai Mauxes tuag rua huv tebhaws Mau-am lawvle tug Tswv tau has tseg lawm. Tug Tswv muab Mauxes log rua huv ib lub haav huv tebhaws Mau-am kws nyob ncaaj lub nroog Npepe-aus, tabsis txij thaus ntawd lug txug naj nubnua, yeej tsi muaj leejtwg paub has tas tug Tswv muab Mauxes lub cev coj moog log rua qhov twg lawm.*”

Qhov nuav qha rua peb paub has tas Vaajtswv tu, paam hab log Mauxes zoo heev rua qhov tsi muaj leejtwg paub tas Vaajtswv muab Mauxes lub cev log rua lub chaw twg. Qhov kws peb tu, paam hab log peb tej tuag zoo yog qha has tas peb fwm nwg, fwm Vaajtswv hab saib tuabneeg muaj nqes. Qhov kws peb saib tuabneeg muaj nqes qha tau rua luas tuamcuab pejkum suavdlawg has tas peb yog ib tsaav tuabneeg kws vaammeej. Tub yog vim le nuav peb Hauvpaug Koomhum Moob txhajle tsim muaj phoo kaabke paam tuag nuav rua peb cov ntseeg suavdlawg coj.

Paab Kaavxwm Npaaj Phoo Kaabke Paam Tuag

Kx. Tsaav Nyaj Kwm – Thawj Kaavxwm
Dr. Txawj Teeb Thoj – Lwm Kaavxwm
Dr. Nyaj Looj Yaaj – Tug Teevntawv
Kx. Nyiaj Xyooj Yaj – Tug Paab
Kl. Xaiv Phaj Koo – Tug Paab
Kl. Num Yig Yaaj – Tug Paab
Kl. Txawj Tsaab Muas – Tug Paab

I. THAUS MUAJ IB TUG TSO NPLAJTEB TSEG

A. Kev Npaaj Rua Lub Nteeg

Thaus muaj ib yim tswvcuab twg muaj tug taag simneej, xwbfbw hab txwjlaug yuav tau moog nrug yim tswvcuab ntawd saablaaj txug cov dlejnum nraag nuav:

1. Lub nteeg
2. Kev txhawbzig hab kev thov Vaajtswv

B. Cov Tuabneeg Ua Dlejnum

Vim teg dlejnum nuav yog pawg ntseeg le dlejnum, pawg ntseeg yuavtsum paab nrug lig kuas tav. Lub rooj tsaavxwm yuav tau lug nrhav cov tuabneeg dlha dlejnum le nraag nuav, yog has tas xyomcuab muab tso rua pawgntseeg lossis tsev xyomcuab kws tsi muaj kwvtij ntseeg.

1. **Xwbfbw** – Nwg yog tug muab kev nplig sab, lossis nrug tsev xyomcuab thov lwm tug xwbfbw tuaj muab kev nplig sab rua huv tsev txag.
2. **Tug Sawvcev Xyomcuab** – Nwg yog tug cevlug hab saib tej phaajtshaab (kev siv) nruabnraab ntawm tsev xyomcuab nrug rua tug kaavxwm.
3. **Kaavxwm (2 leeg)** – Obtug nuav yog obtug kws ua dlejnum xwsle saib kev noj haus, hu qhua, saib cov qhua kws tuaj hab txais tshaavntuj.
4. **Tshwjkaab (4 leeg rov sau)** – Ua zaub hab ua nqaj, rau zaub rau mov rua cov tuabneeg tuaj tau noj.

5. **Nam Ua Mov (4 leeg rov sau)** – Ua mov rua cov tuabneeg kws tuaj ntawd tau noj.

C. Kev Hlub

1. **Cov Yuav Hu Tuaj Paab Hlub** – yog nam txivdlaab, xov txivdlaab, pujnyaaj, txiv dlaablaug, cuag nyaab, cuag ntxhais, ntxhais-vauv. Cov lug kws moog hu has le nuav:

“Kuv tuaj hu koj, koj yog _____. Nwgnuav peb _____ ib paas nqug tsi lug, kuv tuaj has rua koj paub es thov koj tuaj nrug peb hlub. Tabsis peb yog cov ntseeg, thov zaamtxim, peb tsi muaj qaij kaus,¹³ sawv sau thawv, ntaus nyuj, siv xyaab ntawv los yog siv dlej caw. Peb tsuas yog hu koj tuaj nrug peb hlub xwb. Nub qhuatxwg (nub ua ntej coj moog zais/log) yog nub _____ . Nub saamsaab (nub zais/log) yog nub _____ .”

Teb: *“Aub, tu sab ntau. Ua caag tsi nov lug/xuv zoo es ho yuav nov lug/xuv phem (tsi zoo). Nubnua peb _____ tuag, tuag tsi nyog ob-peb zag, tuag tsuas tuag ib zag xwb. Ua le es kuv maam tuaj.”*

2. **Cov Kws Raug Hu Tsuas Yog Moog Hlub** – tsi muaj qaij kaus, tsi muaj ntaus nyuj, npua tua, los yog cawv. Tabsis moog paab nyajtxag, dlaagzug, hab kev noj haus.

D. Kev Cob Dlejnum

Thaus hu tau cov hauv-dlej hauv-num tuaj txhij lawm, tug sawvcev xyomcuab lossis tug kaavxwm yuav tau cob hab qha dlejnum rua puab saib yuav npaj lecaag rua kev noj haus.

¹³ Lu lug qaij kaus, sawv sau thawv, ntaus nyuj puavleej txhais has tas kuas tuaj tua nyuj.

E. Lwm Tug Kws Yuav Tau Hu

Yuav tau hu moog qha rua HKM hab tej pawgntseeg kws nyob ze paub txug pawg ntseeg muaj tswvcuab tso nplajteb tseg.

F. Dlaim Komtswj

1. **Nyob Huv Tsev Txag** – Kev npaaj komtswj, yuav npaaj le nraag nuav los tau:

Timsuab (Prelude)
Hunkauj (2 zaaj tej)
Thov Vaajtswv
Nyeem Vaajlugkub (Yauhaas 11:25-26; Yudas 1:21; Yauj 1:21; Paajlug 23; 2 Kauleethaus 1:3-7; 2 Kauleethaus 4:17-18; Yaxayas 41:10).
Nkauj Txhawbzug
Qha Txug Tug Tuag Lub Neej (tso rua mo qhuatxwg)
Qhuabqha
Hunkauj
Thov Vaajtswv Xaus
Timsuab (Postlude)

2. **Nyob Tim Chaw Saamsaab**

Hunkauj (ib zaaj)
Nyeem Vaajlugkub (1 Thexalaunikes 4:13-18; Yauhaas 5:25-29; 2 Kauleethaus 5:1-9; Tshwmsim 7:15-17).
Thov Vaajtswv

3. **Cov Xwbfwb Kev Qhuabqha**

- a. Thawj-thawj zaaj nyob rua huv tsev txag: Siv tej nqai Vaajlugkub kws nyob rua huv Chivkeeb 2:15-17 lossis Tej Lug Qha 12:7.
- b. Mo qhuatxwg: Paajlug 6:20-23; Ntawv Nkauj 23; Henplais 9:27; Loos 13:8; Tej Lug Qha 9:1-4, 10.

- c. Tej lub ntsablug kws zoo muab ua lug qhuabqha:

Cov laug: “Khaws Koj Txiv/Nam Tej Lug”
“Koj Txiv/Nam Cov Lug Kawg”
“Koj Txiv/Nam Tug Dlejsab”
“Cov Mivnyuas, Noog Kuv Tej Lug Qha”

Cov Mivnyuas: “Tu Sab Kws Nrug Meb Nyob Tsi Ntev”
“Yaam Kuv Ntshaw Ntawm Meb”
“Tsi Yog Taag Kuv Xwb”
“Ua Meb Tsaug Rua Txhua Yaam”
“Kuv Tub Txug Tsev Lawm”

G. Txum Yim Hab Txais Yim

1. **Kaavxwm Hab Xyomcuab Has:**

“Uatsaug os mog, koj tseem xaav neej xaav tsaav xaav kwv xaav tij, koj tsi cale, koj tseem nqaa nyajtxag tuaj paab peb tsev xyomcuab tam kev kwv kev tij kev neej kev tsaav. Peb tsev xyomcuab yuav neu koj txajntsig tshaavntuj mog. Thov Vaajtswv foom koobmoov rua koj.”

2. **Tug Txais Yim Has:**

“Tsi xob uatsaug mog, nwg qaug ib caug nwg sawv tsi taug, nwg qaug ib rug nwg sawv tsi lug. Kuv tuaj los kuv tsi muaj dlaabtsi, tsuas yog coj lub qhovmuag tuaj saib xwb. Xob ua tsaug. Nkim lub tsaug os mog.”

3. **Tsi Pub Pe Hab Xyom**

4. **Peb Cov Ntseeg Cale Has Lug Uatsaug Xwb**

II. KEV UATSAUG RUA MO XAUS

Cov ntseeg tsi muaj nqug lub rooj lawm, tabsis muaj uatsaug rua mo xaus le nuav:

A. Kev Uatsaug

Kev uatsaug nuav tsuas yog ua huv lub saamthaj tsev txag kws yog mo xaus ua ntej lossis tomqaab xwbfbw qhuabqha. Cov kws yuav lug uatsaug muaj le nuav:

1. **Sawvcev Xyomcuab** – Has lug sawvcev xyomcuab uatsaug rua obtug kaavxwm.
2. **Thawj Txwjlaug** – Has lug uatsaug sawvcev pawgntseeg rua kaavxwm, tshwjkaab, nam ua mov, cov paab dlaagzug, hab kwvtij neejtsaa.

B. Cob Tsev Ntsojntsuag

Kaavxwm yuav tau nrug tug sawvcev xyomcuab hab tsev tuabneeg thaam saib leejtwg yuav ua tug tsomkwm tsev tuabneeg ntsuag ua ntej lug has qha rua kwvtij neejtsaa suavdlawg.

III. LWMYAAM

A. Kev Tua Tsaj

Lub neej taag lug, yog nam tuag ces neejtsaa yuam kuas tubki tua tsaj tua txhuv; yog leej txiv tuag, cov kwvtij yuam kuas tubki tua tsaj tua txhuv. Peb lug ntseeg Yexus, peb tsi pub yuam lawm. Kev tua tsaj tua txhuv yuavtsum tua kuas txaus noj txaus haus lug tam qhua xwb.

Yog tug tuag tsi muaj kwvtij neejtsaa los yog tubki, pawg ntseeg yuav tau npaaj kuas txaus noj txaus haus lug tam qhua (Kalatias 6:10).

B. Kev Tshaavntuj Rua Cov Tsi Ntseeg

1. Cov ntseeg paab tshaavntuj moog rua tej yim tsi ntseeg kws tau kev pluj kev tuag, yeej tsi txhum Vaajlugkub (Mathais 5:43-48). Kev tshaavntuj yog paab rua cov tseem ua neej nyob kws raug kev txomnyem xwb.
2. Paab dlaag zug rua cov tsi ntseeg los tau, tabsis tsi xob koom rua tej yaam kws fij rua dlaab (Tej Lug Qha 7:1-3).

C. Kev Paab Rua Cov Ntseeg Moob Kws Tsi Zwm Rua C&MA

Yog muaj ib tug Moob ntseeg kws tsi zwm rua C&MA thov kuas peb cov tswvcuab paab hab ua kevcai plujtuag rua, peb tej pawg ntseeg yeej paab tau.

D. Noobncoos

Tsi pub kuas muaj, tsi has cov ntseeg yuav nqaa moog rua namtais yawmtxiv tsi ntseeg los yog ntshais vauv tsi ntseeg yuav nqaa tuaj rua namtais yawmtxiv kws ntseeg (saib ntawm nplooj ntawv 31).

↔ Txhua yaam kws tau has lug sau nuav, Hauvpaug Koomhum Moob Rooj Saablaaj Txwmxyoo 1992 (Kansas City, KS), 1993 (Des Moines, IA), hab 2004 (Seattle, WA) tau pumzoo yuav le has lug sau nuav lawm.